

四庫全書

子部

欽定四庫全書

子部

寶真齋法書贊卷二十一至二十四

詳校官中書臣孫溶

編修臣程嘉謨覆勘

總校官候補中允

臣王燕緒

校對官庶吉士

臣潘紹觀

謄錄監生

臣吳熙春

欽定四庫全書

寶真齋法書贊卷三十一

宋岳珂撰

宋名人真蹟

邵仲恭展晤省見二帖

並行書第一帖九行第二帖三行

齠叩頭哀苦無慘不獲時拜書問不審邇來尊候如何
齠哀瘵蒙恩未緣展晤仰祈對時保重區區祝頌謹奉
手啟不次孤子邵齠叩頭鴻慶太祝

三十一舅三十一姪君到鄉事少間即常到省見外
婆洎諸姪也聞恐知之

右崇寧真龍圖閣知蕪州邵公馥字仲恭展晤省見
二帖真蹟一卷邵氏多以字畫顯如公主糧餉而有
安衆之勇壻黨籍而無任己之溫尤可嘉者帖以開
禧乙丑四月得之丹陽顧氏蓋其里云

贊曰寶晉大字之刻嘗同公遊必嗜好之素同故忘
情乎尋壑之與經丘子嘗陋貞觀慰問之不收得此

帖于鄉考百年之風流識者必此曰吾宋之邵蘓州也

龔深父南康帖

行書十一行
尾批二行

原頓首辱惠書欣承法候萬福慰釋慰釋原蒙恩出守南康正遠良集千萬自愛以慰頌言遽中作復潦草尚冀道照不宣原頓首惠因信公法師

會沈正叔煩致意人速不果上狀原

右崇寧兵部侍郎龔公原字深父南康帖真蹟一卷

按國史公自瑣闥以議泰陵喪禮出知南康軍此帖
蓋以別所與遊之僧者有藏書家六印紹定戊子四
月得之毗陵士人孟葵家

贊曰公用王氏學術終始不易雖有歎于識然亦足
以知其自信之力一偏之溺異端之惑視此手蹟

張文忠至都帖

草書
七行

商英啓辱教承已至都下薄寒起居佳休令甥書蟹已
領旬休卜見不宣商英再拜知郡朝奉

右大觀宰相太保張文忠公商英字天覺至都帖真蹟一卷予舊與匡山西寺僧師王游以慶元戊午二月得此帖于其室玉得之僧聰聰得之僧傑傑得之無垢張待制家其自言付授如此

贊曰無盡之學出入孔釋故其筆法倜儻斜直于跌宕中時入繩墨亦猶即紹聖以梅元祐之正用大觀以反崇寧之謫凡是心之所蘊已畢寓于深畫雖曰自益斷猶可議使其知根芽之物則而推以芟葛藤

之蒙開如是帖者亦可以為傳世之名蹟矣

張文忠草書韓退之桃源詩帖

草書五十一行楷
書名記一行前有

何人標題一行後楷

書前詩二十二行

天覺丞相書韓退之桃源圖

神仙有無何耿茫桃源之說誠荒唐流水盤迴山百轉
生綃數幅垂中堂武陵太守好事者封題遠寄南宮下
南宮先生欣得之波濤入筆驅文辭文工畫妙各臻極
異境恍惚移于斯架巖鑿谷開宮室接屋連牆千萬日

羸顛劉蹶了不知地圻天分非所恤種桃處處惟開花
川原遠近蒸紅霞初來猶有念鄉邑歲久此地還成家
漁舟之子來何所物色相猜更問語大蛇中斷喪前王
羣馬南渡開新主聽終辭絕共淒然自說經今六百年
當時萬事皆眼見至今幾許猶流傳爭持酒食來相饋
禮數不同樽俎異月明伴宿玉堂空骨冷魂清無夢寐
夜半金鷄啁晰鳴火輪飛出客心驚人間有累不可住
依然離別難為情船開棹進一迴顧萬里蒼蒼煙水暮

世俗寧知偽與真至今傳者武陵人 韓退之桃源圖
右張文忠草書唐韓愈桃源詩真蹟一卷本朝草聖
代有名人如公不以書稱而偉特軒翥如此蓋亦胷
中之鬱勃不能伸于二祭者故有託諸此也帖故藏
沂恭孝王家有印識存不知何緣流落江浙紹定戊
子三月予得之京江首標一行及未系真書詩本俱
不知何人筆意亦可取

贊曰太守宰相張天覺草聖之神何卓犖幾年嘉禾

識竒作餘事猶令墨池涸仙源三月桃李落雲黑洞
深風色惡夢回滿紙字如昨喚起龍蛇見頭角

趙清憲近郡帖

行書
五行

挺之再啓不才蒙恩臨守近郡方賴賢者助之承已解
秩不勝慊然猶幸欣集少慰瞻企挺之又啓

右大觀宰相司徒趙清憲公挺之字正夫近郡帖真
蹟一卷元祐中公自御史以不言蔡忠懷安州詩事
謫楚州是帖蓋當時與郡僚者不知指何人紹定戊

子三月得之吳門士人王之德有藏書家二印

贊曰兩蔓菁之為蒼生孽蓋不啻于潰腸爛胃之酷
烈公為秦和亦既力辨而逆折矣顧亦知市中所貨
之參苓即當日之鳩葛乎陵下授上之相從揣中入
之旨而倡紹述者固後來之萌析也所趨蓋繇此而
異輒矣今觀遺蹟清平茂悅又何不類乎一時之勇
決也賦詩一絕首為是說予聞之楊文節

趙清憲挽辭帖

行數
原缺

禍十七應之兄學士挽辭 趙挺之

廓落襟懷德藝優身名曾不問沈浮當年冊府曾同命

早歲文場每並潺寂寂舊廬東觀曉翩翩歸旒北却秋

都城猶記樽前別

余元祐八年出使京東應之錢別
于相國寺第二院酒罷余遂出城精

爽今隨逝水流

右趙清憲楊應之挽辭帖真蹟一卷按應之名國寶

東萊呂氏之甥其行己之介務學之純在伊川門人

最表表者帖與張子野二辭借來較之手帖益無一

筆不似異出而昭合信乎其真也

贊曰公為中司排擊元祐故臣而猶拳拳于伊洛之門人豈奏疏陳事或為世資而詘而作詩懷友固不害于私情之伸耶於羣是私情也而實出于公言此吾之所以重歎而列之于斯文也

吳開府前日帖

行書
九行

居厚頓首前日獲從容教益少慰馳情信宿伏惟動止萬福使至蒙手墨尤以感佩知從御來旦遂南塗中萬

萬若時倍加珍重不勝誠禱不宣居厚頓首再拜伯彊
長官服次

右大觀知樞密院武康節度使開府吳公居厚字厚
老前日帖真蹟一卷裕陵嘗謂公才智有餘辦治為
一時最然于天下不能無議也洪為公畫繡地慶元
己未五月得此帖于洪人王集大成

贊曰豫章之東湖有公之居西山薦圖味鳳滴蜃伊
波之餘而無以昌其書嗚呼

章申公展居帖

行書九行
尾批一行

惇啓專人惠問佩服勤厚庚伏畏暑信後佳否衰拙屏
居如昨相望十舍未有晤集之期千萬自愛奉此叙謝
不宣惇頓首子高知軍大夫足下十三日

右兩朝宰相太師章申公惇字子厚屏居帖真蹟一
卷公才偉矣而用之者背馳使英道之姿與翰墨俱
鬱悲夫欲厚之世因其蹟識其人猶不可弗錄也開
禧乙酉七月得之富沙

贊曰張無盡嘗謂公竒男子夢中劇談若或見之矧
予于手蹟之遺猶足以觀百年之風姿任繁于時才
高用違覽者未嘗不三歎息于斯嘻

薛黃門春聚帖

行書
兩行

春聚伏惟雲休昂上問

右大觀門下侍郎薛公昂字肇明春聚帖真蹟一卷
予嘗與公之孫宥為僚今二十年矣獨未識公字畫
幅紙九字實與趙清憲帖偕來斯亦可以想太平之

人物也

贊曰九字在紙落落星晨此帖之傳猶及太平意象
軒昂足稱其名作此贊焉惟字之評

晁之道促裝帖

行書十行
尾記一行

詠之再拜上覆頌教答伏審尊體萬福下情感慰官期
已迫當遂促裝久間亦宜早就道也詠之殊未有所向
孤寡愈難扶持且久忘懷矣未有承教之日千萬保重
不備詠之再拜上覆八兄通判朝奉嫂縣君座前七月

二十四日

右大觀提點崇福宮晁公詠之字之道促裝帖真蹟一卷公上書入黨籍邪等文章名節照映一時予家元江州歲從公子壁游仰世德之弗替幸門素之有考是帖得之其家益慶元戊午十一月也

贊曰仕以行義有時乎為貧也兄弟之間情事貴乎真也公起異科事不患不伸也囊封叩闕因以警失君也忠既弗售反以錮終身也扶持之難曷敢尤夫

人也今觀斯帖凜乎其若存也於虞文元有以教子孫也德之不孤吾知必有隣也

霍仁仲指教帖

行書
四行

小姪文與獲備洒掃之役凡所不逮乞一一指教深所望于大賢也切懇切懇

右政和吏部侍郎霍公端友字仁仲指教帖真蹟一卷太平文物至祐陵而盛公以龍首位豹從才學著聞實一時翰墨之選書蹟傳世固其宜也帖藏常之

富公胡窠家嘉泰壬戌十一月得之會稽

贊曰金斗之魁祥爛兮流光玉瑀之西箱頎兮荷囊

寶墨之淋浪蔚兮遺芳百年之中緇宜兮誌藏

葛文康書簡帖

十三行並行書第二帖十四行第
二第四帖各八行第三第七第八

帖各十行第五第九第十帖各十一行第六帖十
三行第十一帖四行第十二帖七行第十三帖二
行

勝仲輒以少意上浼許師德少尹名昨鈞從寓青墩日

屢嘗望履幕捐館踰年小人乘隙凌蔑其家近有僧法

初等昏賴墳山地已蒙漕臺僉廳定斷係許家有理而秀州及歸安縣元斷不當更送使府司理院審許伏乞鈞察早賜結絕其子許孝納有事目上呈孝訥于勝仲為甥而家兄工部冢婦乃師德女也又聯蔡安世親好因其見委乃以冒聞非親黨不敢犯不韙幸恕諒勝仲惶恐上覆

勝仲又啓先公銘文十九日遣介稟呈不知何故未達重煩見速祇益恐惕并已有書道義諒是續到矣慮有

要增損無惜示下勝仲又上

勝仲特蒙寵餉美醞及死腐皆間居所難得深佩遠意
勝仲以方去官例不拜知識之饋于左右原眷獨不敢
辭然在事日數忤雅意今日辭受惟谷但有慙汗而已
謹布啓道謝悃之萬一勝再拜又上

勝仲諂目再拜述功大孝大夫專使又拜教幅且審順
履炎亭孝體如宜不任憇拊閔雨深有旱乾之憂奈何
奈何未緣款晤伏祈以時保衛不宣勝仲頓首再拜

勝仲頓首再拜大孝簽判大夫侍史乖隔歲久咫尺甲
第未遂修謁每勤景嚮即日初暑伏惟晨夕孺慕孝履
如宜勝仲竊祿詞館託庇粗如昨未間伏祈以時厚衛
不宣勝仲頓首再拜

勝仲又啓為郡幾年以賦輿不繼殆成怨府辱干間秩
歛蒙賜罷如釋負擔况辱誤恩寵以故職豈勝感幸敢
謂高誼特以書辭為祝禮勤意重何以克當前在事日
不敢出城解官之初即至妙喜訪杼山遺跡因到盛庵

棖題輪奐甲于境內仰服送終之孝深懷晤語之益未有造門之便伏紙詹仰勝仲又上

勝仲詣目再拜述功大孝大夫專介復奉手蹟具審邇日孝慕之餘起居如宜感慰無量授官月日及大父銘刻並已紙領餘當如戒謹奉啓布達不宣勝仲頓首再拜述功大孝大夫座前

勝仲再拜又啓馳光荏苒歎復改歲伏惟名德之重宜濶步霄堦久矣乘此泰亨即慮峻用與國同體雖屏居

無階為壽然傾祝不勝真切也方欲馳附而慶問先及
但極感銘爾勝仲再拜又上

勝仲又啓勤渥之春波及賤息兩造賓廡皆蒙飲食數
載之感刻無喻乏便失于即謝悚反悚反時事旬日來
無所聞益水村尤僻如鎮中胡編修可謂鳳鳴朝陽朝
野共稱之聞平江權守大漕公亦獨不迎敵書雖在田
畝惓惓實日有漆室之念爾勝仲又上

勝仲再拜又啓去歲辱節饋甚腆俛俯一年又煩不遠

百里輟人船賜以酒饌仰惟厚意何以克當但劇感媿
而已勝仲近于舍南葺小園桐竹粗成倫次小亭三數
不覺度日無得一冬無虞何其幸也頗聞甲第亦展林
祊之勝未緣造門求觀臨書但劇馳繫勝仲再拜又上
勝仲蒙餉清熱二醞仰荷不忘不勝感媿特勤介使尤
荷尤荷勝仲拜謝

勝仲再拜比日不審動履何若才諳有聞宜見褒擢尚
此淹翔頗鬱公議行聞明薦亟踐要途以慰輿論勝仲

再拜

賈眷一一均慶勝仲上問

右政和大司成顯謨閣待制葛文康公勝仲字魯卿
書簡帖十三幅真蹟一卷公以文鳴盛朝流福燾後
台文與康易名稱矣乎澤固太平君子之遺蹟斯亦
足以想東都之風也帖因先後彙所蓄而得不能徧
記歲月特其中指胡忠簡為鳳鳴朝陽者乃紹熙庚
戌歲公之孫丞相在東府先君為都曹暇日燕見語

及紹興講信事適有持此帖獻者遂舉以遺云

贊曰辭以情達義以氣激以素心期託名手筆都曹
之獲中寓其一尚想風流太平人物

二蔡陪輔展晤二帖

並行書一帖十
一行一帖六行

京頓首拜久不敢敷進記引望門關不勝馳情邊聞比
益多事伏想經畫夙夜仰勤台用雪寒不審動靜何如
恭惟碩望天下所冀以福己者陪輔之任入立以須側
聽告廷以愁士言非特區區私願所激京頓首拜啓

昨夜得展晤雖不款盡亦粗慰區區也雪候極寒計安佳清燕堂二器送去助小飲不一縷叙卞上

右宣和太師領三省蔡魯公京字元長崇寧知樞密院開府蔡文正公卞字元度陪輔展晤二帖真蹟共一卷公之子條叢談有曰先魯公嘗問米芾今能書者有幾芾對曰自晚唐楊少師近時公家君謨後天下獨有筆三管公家兄弟與芾而已今觀所書良是惜也其無以傳也慶元戊午八月予試江西漕臺得

之豫章王氏

贊曰王氏之鬻他帖也有紙縑其間予見其物墨闌
珊既磨而殘取而考其氏名輒長愾而永歎曰予聞
之叢談是與忠惠者若是班乎今驗其字體則豪放
而具骨力激越而競波瀾使名節足以齊馳則亦何
羨乎二難然而所立所趨其視忠惠何啻汙池之于
泰山故雖鬻駟尚得而唾棄之世之以藝稱者斯亦
足以觀矣

徐明叔向熱傳達二帖

第一帖單書九行
第二帖行書四行

競頓首再拜彥光提舉朝議丈台座即日夏序向熱恭
惟台候動止萬福競間退之久日自知安正遠瞻對敢
乞惠序保衛益介壽祉謹上啓不宣競頓首再拜彥光
提舉朝議台座

競惶恐再拜頃蒙台旨寄方存道書庵傳達得領書上
呈伏乞視之競惶恐再拜

右宣和書學博士刑部員外郎徐競字明叔向熱傳

達二帖真蹟一卷鷄林求能畫公以介行歸奏圖經
遂錫名第十學既設公以師著握蘭舍香寢極清選
凡此者俱可以占其能矣嘉定辛未五月得之上饒
贊曰書名之行始于東夷歸而範模則有餘師中興
幾人存此絕技太平之風尚想漸被

周美成及議帖

行書
九行

拜彥叩頭罪逆不能奄及祥除食貧所驅未免祿仕言
念及此益深哀摧此月未挈家歸錢唐展省墳域季春

遠當西邁寢遠友議豈勝依依尋即奉書以候動靜拜
彥叩頭

右宣和大晟令徽猷閣待制清真周公拜彥字美成
友議帖真蹟一卷汴都治賦公以文藝動入主而卒
以詞名天下豈雕蟲篆刻之所推歟字畫之傳斯亦
稱矣嘉泰甲子十二月舟過吳門遇公之孫某同上
蘭省道中相從訪而得之

贊曰左太冲賦三都十年門牆藩溷皆著紙筆于意

其因以寓墨池模倣之妙而未必徒以詫記事備言之述不然則亦焉用是物也如公書法或者得太冲之髣髴乎有鳳樓之手以侈其標度有香奩之澤以醞其風骨體具態全夫豈一日情真之名公所自出世不當徒以考公之詞賦尚有因是著公之翰墨也

翁端朝輕利帖

行書
七行

彥國啓此承訪建殊慰間濶秋雨伏惟起居輕利初七日輒屈象駕訪及兜率一飯千萬肯臨諸得面可究不

宣彥國上啓普照禪師道舊

右靖康御史中丞寶文閣直學士翁公彥國字端朝
輕利帖真蹟一卷慶元己未六月予在中都得之麋
子長

贊曰結字清而峻用筆精而穩雖牋以粉而墨蹟猶
未損公之功名予固未暇論而所謂書法要必有所
本矣

吳王造見應命二帖

並行書第一第
二帖各七行

拜悚息起前日幸邂逅未果造見懷仰何量枉教欣審
尊候萬福謹奉手狀參承不宣拜悚息再拜宏父知府
少卿賢友台座

惠札極欲應命屬目疾久為梗繼而復有御前文字遂
不暇至今然已界下紙非久上納稽緩負愧深劇時雍
再啓

右靖康翰林學士承旨吳公玠字正仲吏部尚書王
公時雍字口口造見應命二帖真蹟共一卷圍城之

事有識者不忍言也予之得是帖蓋雜他書所錄者
字而已

贊曰所書如此而事如彼既悅我目亦冷我齒我錄
此事與郝超比名焉不刊帖亦奚毀

耿黃門讀易帖

楷書十
五行

南仲啓數日間繼有客至勞勞無休息期今日得暇方
親筆硯欲答前書後失來又辱言教就審邑事之暇眠
食安佚為慰長箋見貺深戢勤懇煥然文綉誠為過禮

寧不愧感也南仲少年讀易終無一得每達老師宿儒
未嘗不折節求教况吾賢令能講解其深蘊乎何惜為
我道耶雨雪未霽邑中沾足否何時接辭慰此懷想南
仲頓首虹縣宣德足下

右靖康門下侍郎耿公南仲字晞道讀易帖真蹟一
卷和識之誤天下久矣公于厥初亦未知其究蓋如
此嗟乎亦天時也哉帖得之先君之客耿端仁實開
禧乙丑之八月

贊曰堅屋履霜誨盜慢戢戒隳乎復隍亡繫于苞桑
一乎柔以御剛確其信于殊方以是謀國迄于靖康
則讀易之無一得蓋公之所愧殆非空言以成報章
尚其監茲前事不忘

宇文宿愁兩漢帖三冊

並楷書今擬高惠呂后文帝記其四板又半板凡三

十行繁贊餘
文多不錄

前漢帝紀

自高祖講邦考起至文帝紀致敬無
所詔止皆則節漢紀成文今不錄

右建康簽書樞密院贈少保宇文肅愍公虛中字叔

通四漢帖真蹟三冊靖炎之交天地屯否公馳單車
奉明詔以使不測之地留龍度踰二十年卒以忠死
立身大節逾久逾彰逮乎乾道韓王之歸申以嘉泰
褒表之制汗青炳如照映千古是詩益公在南時手
所刑節于心有取片語弗遺細字貫珠一筆無誤雖
螢牕雪几窮年矻矻以課拾芥之效者尚不能無始
勤終怠之異而公之成編貫穿四百載蒼萃十萬言
約不失踈繁不失冗凜然翰墨之英炯炯在目凡公

之必久折不變百鍊益剛弗渝弗磷有猷有守者殆
于寫是書之時已可占之矣珂舊登公孫忠惠公紹
節之門紹定戊子夏四月獲觀手澤繫贊述志于以
想節義之閑真有以見公之無入不自得焉

贊曰昔前輩之觀史也惜陰以分晷繼膏杖殫磨鉛
刻槩之功以積數十年之勤夫豈徒以尚夫文哉忠
義一節君臣大倫蓋不惟將以取諸人又將有以視
其身也今考公之行已豈不足以信予之聞耶方其

指事而料女真抗疏而諫燕雲先見洞昭隱憂畢伸
蓋自比夫捐之之棄珠厓安國之爭和親買生之慟
哭流涕徐福之曲突徙薪速既往之不咎歎寇患之
益深主辱臣死不辭朔塵又欲比夫張騫之取月氏
當惠之聘烏孫罷齊兵如鄠食其御太公如平國君
既而國勢未張中原霾昏哀頓挫于九死誓終身之
弗諼又欲比夫剛直之揚信掌距之陳遵充國之自
脫于胄奴蘇武之伏節于海濱所以發廋語之書以

達川峽則道魔力之已退祈妻子之流以續家祀則
先敵約以自陳昭然此心質于蒼旻其後家已遺身
已倫盟歎已牢以讎為鄰公于是出不得已而竊比
乎李陵之自循有志于千秋之冠軍期于義陽侯之
刺樓蘭庶乎開都尉之殺虜賓考初揆忠公之志業
其有得于史者亦可謂詳倫矣孰知夫繳蠟書以漏
大謀黨仇敵而殲忠臣有如亡秦者哉此編其藏手
釋之真一卷得師公心不泯

李忠定單騎帖

行書
六行

貴聚伏惟萬福賤累輩本欲只畱福唐適臨行為海冠
所驚不免挈行當泊家上饒單騎以趨行在也舍弟必
時拜見有所諭幸告之綱再拜

右建炎相國李君忠公綱字伯紀單騎帖真蹟一卷
靖康之初長蛇薦食公起庶僚奮特天戈以攘以毆
卒全廟社建炎爰立首明綱常用正大刑人心既回
國勢亦活彼其救太原結契丹議巡幸噂嚙是非要

不足為大體疵也予舊識公之孫架閣君大有屢求
遺帖而不可得紹定戊子四月羽士劉君道謙以書
自中都來緘是帖見遺始得公手澤蓋剛勁特立之
操尚可概見云

贊曰立國有大勢一退則必靡公之守京師蓋社稷
之計異時之失緊守之者不通而泥在公無罪也立
人有常道一隳則必廢公之正綱常亦天地之義異
時之咎謂開之者不懷而畏于公無悔也謀敵有機

術之隙則必逐公之結契丹乃當為之理異時之釁
蓋用之者不密而跪非公本指也於序天方長亂迭
仆迭取人謀弗同特其一耳使世之任事者皆以公
為諱誰則肯出身主國大議圖全者不愛于棄地僭
偽者無嫌于竊位招攜用間之策皆不容于置喙殆
非有國者之利至于聞命單騎不以家為累惟吾忠
是視此人公之素志于此帖蓋得公經綸之緒餘
而初不論其揆辭之與結字也

寶真齋法書贊卷二十一

欽定四庫全書

寶真齋法書贊卷二十二

宋 岳珂 撰

宋名人真蹟

汪忠定栗冽帖

相書
十行

伯彥頓首拜啟大參政鈞席即日玄英正序寒氣栗冽
恭惟協贊政機內脩外攘神明相勞鈞候萬福謹奉啟
起居不宣十一月二十一日伯彥頓首再拜啟大參政

釣席

右建炎宰相保信節度使開府汪忠定公伯彥字廷俊栗剌帖真蹟一卷睢陽受英公有翊載之勲首登台衡以穆天紓而卒以履餽聞一跌不復猶能以聲烈被災海問珂侍先君牧五羊遺愛之傳尚可接也帖蓋舊藏先君子其孫德翰所獲之歲月不識

贊曰黃霸為相功名滅于治郡尺或不足而有餘于寸文翰聲跡百年一瞬遺帖得于其家殆亦足以傳

信

朱忠靖按巡郡寄邸報三帖

並行書第一帖五行
第二帖六行第三帖

三行

勝非頓首上啟運使少卿直閣臺座春有餘寒伏惟按
巡涉履臺候萬福勝非謹奉狀承問執事區區不宣勝
非再拜上啟通使小卿直閣臺座初二日

勝非頓首勝非叨冒郡寄茲踰半年實恃暉蔭未以罪
去而衰疾日增不勝疲曳正初即旬外祠此日累上三

章祇俟命下復還吳中儻遂善去悉自覆護之賜也豫
以感激幸察勝非再拜

眷集必偕行伏惟鈞福見邸報令弟中丞遠朝已有禮
書之命必已知之勝非上問

右建炎宰相魯國朱忠靖公勝非字藏一按巡郡寄
邸報三帖真蹟一卷初帖之藏傳于先君其二得于
慶元之丁巳其三得于嘉定之戊寅或出自閩中之
李或軼諸溧水之秦付受有緒皆獲其真於虜翠華

南巡陽谷未暎妖霧煽昏雲雷其屯晦蒙難之明夷
迄再安于重輪如公之材已不愧于古人矣然而九
河方暉龍馳虎奔挾義馭以不驚兆淵謀之經綸彼
其胸中之奇顧不大于所就之勲耶更後六歲予餉
淮左之軍嘗以公軍之言及公二孫念景行之不忘
撫遺墨而猶存庸贊一辭奉敬英芬

贊曰士孰不排難貴乎安以徐士孰不立節貴乎平
以舒既家國之兼全身名之裕如是興夫激切奮

踏纓冠曼胡者蓋已同功而殊塗我思其人猶及屋
烏而况乎遺書

勝資政山中帖

行書十三行第一行
闕第二行六字闕

親家兄臺座冬序淒凜伏惟燕坐山中盛德有相臺候
萬福康竊祿無補幸與諸累粗遺不足勤念郵未知見
日臨書增情天寒歲晚敢冀上為本朝加護養寢以俟
追召謹啟不宣康頓首再拜上啟參議待制親家兄臺

座閏月三日

右建炎資政學士權知三省樞密院勝公康字子濟
山中帖真蹟一卷公自江右扈從既以失職謫暮年
而奉明道之祠此帖當在是時嘉定戊辰八月予得
之彭澤

贊曰沮徒民于中原廣好生于帝堯亦既三已歸而
漁樵而書尺之間造次不忘乎本朝此所以為中興
之大僚也

趙伯山寶鍊帖

行書
七行

子崧再拜比滌草上狀人至持辱還教累幅動渠豈衰
廢所宜得者以愧以感不可以沉嶺外氣候不常下車
既久頗能諳否惟以道對時寶鍊生理乃佳子崧再拜
右建炎延康殿學士鑑堂居士趙公子崧字伯山寶
鍊帖真蹟一卷近臣之貴宗姓之英翰墨文字足以
垂世如公者亦足以稱矣嘉泰辛酉歲三月得之潭
州漕司吏施大源

贊曰以公姓之麟定執登壇之牛耳即信厚以為俊

竒蓋一家之自為體以道對時居夷何愧此鑑堂之
所以處己而予察之于此

劉資政符寶帖

行書
四行

珏泣血叩頭再啟豚犬具狀拜屈從者初九日素飯望
賜肯臨幸甚別無他容止符寶祝卿諸文耳珏泣血叩
頭再啟

右建炎資政學士權同知三省樞密院劉公珏字希
范符寶帖真蹟一卷公居湖之長興予以嘉泰壬戌

七月得此帖于邑人宋介

贊曰公兩登西掖前後抗論數十疏可謂剛且勁而
扈衛江右遭時不競斯亦可以言命矣夫遺學所傳
雖未足以盡乎平生而亦足以見其行己之簡敬也

葉左丞同升遂意二帖

並行書第一帖十
二行第二帖四行

夢得頓首上啟先用知府舍人台座馳響高誼之素茲
幸同升不意乃復蹉跎豈勝悵惘久欲脩謁適循苦肺
病復作扶持進朝之外不復能辨外事昨日必先來乃

蒙寵賜教誨不敏重增愧悚朝來伏惟白候萬福謹啟
布下情不宣夢得頓首再拜元用知府舍人台座
眷聚伏想均休叔問聞亦請宮祠甚力徑欲還三衢不
知得遂此意否也夢得上問

右建炎尚書左丞崇慶節度使石林先生葉公夢得
字少蘊同升遂意二帖真蹟一卷國朝將相以翰墨
文章著名當世在中興後士夫每稱石林片楮流落
蓋皆可寶玩寶慶乙酉三月得近世十餘帖于行都

以公為首

贊曰早登金扉踏仙蕙晚陪夫政歸擁旄石林風月
出處高清心妙寄同揮毫麗如雲錦披宮袍橫走健
態霜鶚捐萬里筆陣誰能壓推鋒今識真孟勞

沈忠敏勞軍帖

行書十
四行

與求頓首去非知府侍郎老兄台座昨日具報書并度
牒文字度已在途奉告伏審秋晴臺候萬福為慰二劄
已施行然敵之求謂必避爾今車駕欲至江上勞軍因

以督諸將用命要使他時視為成熟不作難也其他由折審如台諭當即以聞人遽草此幸察不宣與求頓首上去非知府侍郎老兄台座

度牒已趣辦可以速求取也

右建炎知樞密院沈忠敏公與求字必先勞軍帖真蹟一卷此帖蓋公紹興甲寅歲與簡齋陳先生者簡齋時以徹猷直閣學士知湖州前輩風節之相似心志之相孚禮文之簡而情義之真皆非後世比藏其

書者亦可以攷其時矣得以寶慶乙酉與石林帖同
出

贊曰任同時也志同歸也相與以心無町畦也職位
接踵亦相齊也噫噫此帖比傳衣也

宗忠簡留守司二劄家書吾友三帖

二劄並楷書
各十行三帖

並草書第一第二帖各
二十二行第三帖八行

今差迪功郎幹辦京城留守機宜文字提振京城四壁
一行事務等宗穎朝奉郎親賢宅講書兼權太常寺丞

呼延次升同捧表詣行在投進迎請聖駕還闕應合行
事件及速施行右劄付幹辦機宜文字宗迪功準此建

炎二年三月六日

押

承節郎劉晟齋到皇弟信王蠟封奏狀並與留守詣目
遣差宗機宜齋蠟封奏恭詣行在投進須至指揮右劄
付宗機宜照會齋赴行在投進施行準此建炎二年三

月初十日

押

五三機宜得汝三月二十九日即伯書知在路一向平

善尤慰遠懷今天氣正難將息而汝在路不勝思憶四月初必速行在兩遣人專寄書必不一

案不一及何日下俱有闕文今

並仍原本諸表不知何日後來會有旨許上殿否曾有六書

與當塗諸公功為一一投之後曾指麾回鑿未馬廣去料須見之滑州番衆盡遁橋亦斷之見措畫過河收復河西州軍若得萬乘歸即天下太平可必致矣亦不知諸公自為如是勞攘何也宋生者既背後為賊要與人出錢當時不欲收下禁何故尚在船中可怪可怪十一

日葉茂見人說五三親婦已般入汴此月二十前後可
到京遂得見丘孫子與七二一房矣汝若從駕回尤幸
尤幸未相見間切好將息不一一押送五三機宜收四
月十二日

會呼延郎中為致意以事多且懶不果作書澤批

宋生即遣之此人必作過恐累汝祝祝

叔澤書寄民師四一姪承務暑熟計時奉姨姨太孺人
安佳偕十六娘四一親婦七二秀才以次一一平書老

叔自十二月十二日奔走將兵無毫髮補俯仰天地尤可差媿也今誤蒙朝廷錄用皆翁翁婆婆與三哥積善所庇但增慚媿而已七五名目已奏上并樓三六走到南京得鄉中消息亦補與一承信郎吾姪但願老叔活得三五年次第亦可需及骨肉但願有功有德有以仰報國恩耳婆婆墳頭柴山與田地亦買些所有價錢老叔自還翁翁墳已託觀民為買四面山種松也投老了得這些事死亦瞑目五三已差二十兵士并兩使臣去

取之矣七五纔得教便遺歸拜嫂嫂也洪都行畧此報
安不一不一叔澤書寄民師四一姪承務

七二姪五一哥更不別書好看孩兒澤批

澤悚息來人備知不肖之冗也撥忙遺回亦不暇一物
為左右問可羞可羞李法言之姪前任信州今在何處
後來吾友曾有郎娘否自此後有書告只用幅紙書不
必做俗為累番圖書也戴元質今尚未赴任應亦窘矣

澤再拜

右建炎觀文殿學士東京留守宗忠簡公澤字汝霖
家書吾友三帖真蹟一卷留司迎請及齋信王蠟表
劉子紫馬方霸府開河朔公實副元帥事首議奪李
固渡以邀敵歸路次復請屯澶淵以解敵圍雖為黃
汪輩排抵不復與府中謀議不卹也雕壇既啟公居
留于京義旅百萬響應雲合又議迎清蹕歸正京闕
汎掃龍德改脩寶籙宮以俟二聖之還以神孝悌之
義次復請躬自渡河乘人心未定奪敵之氣必期殄

滅及信王榛起兵河北遣馬廣至行在又申前請凡
二十餘上最後言丁進有衆數十萬願為陛下守京
城李成願扈從還闕即渡河勒絕敵寇沒角牛楊進
等領衆百萬亦願渡河茲三頭項人皆同寅協恭共
濟國事願陛下速歸九重盜賊戎寇皆無足畏矣繼
又言今不忠不義之臣但知身謀謂祖宗基業不足
卹謂宗廟社稷不足顧謂二聖后妃親王不足救謂
山陵園寢不足護謂周室中興不足效謂晉惠覆轍

不足羞效巡狩之名守偏伯之地儲金帛以為敵資
櫓器械以為寇用慮勇敢之殘敵則禁守禦之招募
慮流移之安業則培保甲以助軍凡誤國之事靡不
為之顧陛下以此章揭之朝堂今朝臣指摘如臣言
涉狂妄乞明正典刑不然乞明告回鑿之期以安天
下之聽蓋建炎二年之四月正公遣子穎及呼延次
升時也既而黃汪輩益不合公自度無與成功憂憤
疽發背七月癸未朔遂薨相去無三月遺表猶贊上

還京先言已涓日渡河而得疾其未曰屬臣之子記
臣之言力請鑿輿亟還京闕大震雷霆之怒出民水
火之中夙荷君恩敢忘尸諫於虜公之心其與天通
乎使天不慙遺卒公之志吾知忝離之痛不復至于
今日矣雖然建炎距今幾百年三尺童子稱忠者莫
先乎公而或者猶以日後之成敗疑公雖盡力于宗
社猶有幸而不盡用之議予不可以不辨按李固之
謀黃汪則曰此不量力也還京之請則又曰此不違

時也龍德寶錄之建河外元帥之投則又曰有後慮也丁進李成楊進等之用則曰不可恃也其後卒皆如言故苟安者幸得以信其說合為牢不可破之談以迄成紹興分裂之勢予則曰是皆不然劉備挾輜重以南曹操固輕騎覆其軍矣何患乎力弱京索之戰劉項不肯失一寸土而後大業卒定于一進一退之頃何慮乎難守肅宗羣臣之表固無害于趣還之詰晉鄭馬依之忠抑何歉于過歷之永殆非所當憂

也大業之羣盜用之太宗則為功臣五代之藩鎮用
之藝祖則為良吏固未嘗不足恃也彼誤國者顧以
此行其欺耳公其能怲怲以從之乎公之死在
公則無憾而于中興之機則可惜也嘉定辛巳予潛
江東嘗從公之孫有文見公遺墨跋而刻之壽思堂
後八載予在京口始得此帖于其兄有德嗟乎力扶
大義識洞大機事擊大節有如斯帖者雖欲勿傳其
可也哉

贊曰人心大義不作不奮楚漢之間較者尺寸翼翼
京邑九聖所都時方多艱天下之樞勢進則張狙詐
作使聚而遺毒不人則已一退則劔彼莫我宗于敵
弗施各逞其鋒天方授吾狼貪如罕使乘其弊隻輪
不返機夫子昨何掇匪今方憤之人未弱之心京國
有君河外有統如彼見開孰不鼓勇聲聲忠簡著數
龜陳瞭其胸中七十之身黃汪何知愛以姑息捐之
中原俾自為敵謂不可敵公方渡河連壁百萬馬騰

士歌公心何憂憤至于死紐不在上雖締易弛榮陽
勿守漢業豈高屠狗攷僧何吠不嚙公之皇皇意固
有謂究觀後來公則知至人謂公跡如祖豫州河南
晉土未終其謀人謂公身如葛丞相祁山屢出竟沮
凋喪惟我謂公特知所先用公之言必也萬全三光
其分五岳其裂天乎奈何誰實為尊精衛往矣所填
者波叫于九閻公心不磨

宗忠簡贈陳秀才詩帖

行書十
一行

詩贈雞山陳七四秀才澤叩首上

渥洼生駿駒丹山生鳳雛家有寧馨子慶自積善餘粹
然秀眉宇瑩徹真璠璣高聲誦論語健腕學大書頭頭
欲第一

李按文學職業
為天下第一

氣已凌穹虛想其願復意何止

掌上珠更明速騰踏爾祖立以須

幸視之以覆醬瓿

石宗忠簡贈陳秀才詩帖真蹟一卷公忠誼根于天
性篤實不華樸素自處惟思以立身揚名為尚毫楮

之簡率字法之清勁詩句之淳質皆于是帖乎可攷
予是以終信夫建功業垂名聲者之果無事乎外也
帖亦得之孫有德與家書帖同至

贊曰赫號之紙幅不盈咫尺字雜衆體詩具二美不軼
不毀相維天只意質功偉有志視此

孫仲益和議帖

行書
九行

觀洛台候動止萬福如聞和議報使來還一門百五十
口遂可偷安卒此歲矣大抵諸公不量力所及而輕信

金定曰方全言
卷二十二
忘言無行之輩淮南數州又蹂踐一空可難息也不宣
觀咨頓首再拜知府宗丞台座

石建災戶部尚書敷文閣待制孫公觀字仲益和議
帖真蹟一卷帖故得之毗陵人胡世臣家時嘉定甲
申之四月簡中詞語端欲為亡秦右袒云

贊曰事君有大義彼國家之不計而惟顧乎妻子之
避地則執筆敵痔惟苟活是視岸然不愧固其素志
于予乎何議

蘇養直書簡帖

六帖並行書第一帖十一行第二
帖十六行第三帖十三行第四第

六帖各十行

第五帖四行

庠頓首啟前日蒙左顧甚寵但時已大醉了不記省未
以縱誕見黜否恐悚無量奉手帖喜聞寒沍起居佳勝
盛製連荷不鄙發藥多矣至感至感旦夕專詣謝次元
遇必已全愈寒甚更珍護為望不宣庠再拜李華先生
座下

庠頓首啟近獲瞻奉已慰人聞之懷復從容池館之勝

觴酌流行間聞警策許時塵土一掃無餘矣乍違已深
馳仰比日伏想燕居萬福庠還山壁觀如昨山中雨餘
草木清潤亦復可樂況凌曉連雲齋鉢遂爾有望想發
函至此當亦絕倒也許遊馬跡日畧賜行趾萬毋渝斯
盟也未聞萬祈珍護不宜庠再拜彥清居士几下

庠頓首啟前邑中得連日承譚誨大慰間闊又辱擊鮮
治具佩厚意無窮已也到家未果上狀令嗣至出所惠
教伏宿初寒起居萬福感慰無量庠曩晚一出歸輒病

卧數日常且杜門瞻見未期萬萬珍護謹勒參候不宣
庠再拜彥清居士几下

庠頓首曩病爾來尤甚公乃過形善禱施及未亡人慙
荷可知又蒙專介惠字禮意尤厚感悚不可言庠抱病
度病長夏若經千百大火聚涼秋再得見公蓋天爾非
人也力疾作此不暇覲縷公八月間能結屣過我乎曾
臆約結非面不能盡庠再拜彥清觀察

因書煩致區區聞爾來香篋富甚能以一瓣見分乎松

間林下一炷似差勝朱門華屋間耳如何如何庠頓首
庠頓首再拜便中奉誨墨恭審訊後尊體萬福下清感
刻東海非日見王仲玉者自彥正處歸所說但云與孟

有不合其勢須去也回書遲遲亦請耳

宋亦請耳三字
上下疑有脫誤

庠俟醫者至即用藥垂老將與草木共盡又多此一段
亦可難爾車從何日定至大港拜見末期萬萬加愛不
宣庠再拜德祖兄座前

右中興時人後湖居士蘓公庠字養直書簡帖六幅

真蹟一卷予來京江顧瞻丹陽維公之居訪其後無
顯者嘉定壬午正月而後陸續得此帖于好事家藏
之以見慨慕焉

贊曰其作字得東坡之骨而加以平實得山谷之體
而去其越軼其應世接物得馮少游之善而持以卑
拙故先生者施之長上居士者待其儔匹兄之又所
以示其親且密意厚詞悉情真制贊列之籤帙神采
空溢雖不識者亦將曰此隱君子之筆也

蘇養直與四僧書簡帖

七帖並行書第一帖十一行第二第三第四帖各十

行第五帖十一行第六

帖十二行第七帖六行

庠啟使至辱手帖伏審即辰秋涼法候輕安庠賤生特蒙齒記及送壽香經疏至感至感來日千萬過此少款已草草為具奉待也得乘早涼來甚佳匆匆不宣庠啟
上山主先公几下

來日更不須託故過此相聚半日為切望約南兄同來
最佳庠上

庠啟前者河上畧得邂逅次日甚欲一詣問訊應接紛
然遂爾中輟豈勝悵仰比日諠濁不審法體何若見彥
清云吾師確求一畫者作平遠欲以見與並見勤厚然
不必如此得暇能拄策見過為閒齋數刻之效乃佳耳
匆匆不宣庠頓首觀音山主懷公几下初七日

庠啟近得款聞軟語為慰無量作別又已旬日懷向已
深暑雨微涼想安禪無惱庠還山日幸粗遣南畝雖屢
得雨尚未霑足然人心少安愈于前日無雨時耳乳泉

必已復故近一想識惠建谿願勝何時得再至泉上與
公然鼎一瀾乎未聞珍護為祝不宣庠頓首觀音山主
懷公几下十六日

庠啟人至蒙示字具審即辰法體佳勝為慰無量乳香
藏冰併荷走寄感忤何已極暑遂得飲冰一快何喜如
之因出能畧垂訪幸甚不宣庠頓首觀音山主懷公几

下

乳泉南有土氣以憤怒之氣未平也一笑一笑壘絢回

庠啟適奉問訊隨辱手帖區區感慰無已且審雨餘法
體佳健竹萌銀蕓頓爾叨貺珍佩何量豈獨琅玕滿腹
殊覺光映七節也如何得公過此同枯淡興味耶乳泉
蒙諭乃如此豈泉上老人亦有步兵青白眼乎他日澄
澈幸攜一缶同試北焙早春也不宣庠頓首觀音山主
懷公几下 二籃同納

芝山主曾否相見院中如此寬潔乃不肯來前日蒙委
曲及之益見慈悲也稍涼能乘興見過試新茶乎因攜

泉來尤佳耳前者勞公有遠公之作實以熱甚竹輿觸
熱而歸老病恐不禁湯水也必蒙垂察庠頓首

見鄭助教且頓致意許見訪何日可來也

庠頓首庠少懇芝山主昨日忽見訪適得渠院中報不
戒于火一夕而燼可謂不幸其師孫已遭縲繫吾師能
于何居士處方便一言解此困厄亦納子慈悲之一端
也率易悚灼悚灼庠頓首

右蘇養真四僧書簡帖七幅真蹟一卷隱君子之與

游游方之外宜也若夫跡似而名弗聞予意四僧之
未足乎此也而帖得之丹陽數剝彼其嗣者知存而
寶之以信于我予之意其薰芝染蘭猶有不泯者足
以遺其嗣也輯而贊之以旌其所遇焉

贊曰彼黃四娘詩于杜陵先南懷芝果何等僧視其
與游尚或可喜于帖之存以識驥尾

蘇養真留客詩帖

行書
六行

戲成小詩留子靜兄庠上

秋霜一夜到帖荷奈此南江秋色何
靳君未作一成去
同聽竹牕鴻鴈過

右蘇後湖留客詩帖真蹟一卷寶慶丙戌七月得之

吳門僧惟永

贊曰予在京江蓋慣識江南之秋一成之去而虛作
十年之留也

朱熹真書簡帖

五帖並行書第一第四帖各十行
第二帖九行第三帖三行第五帖

四行尾
批三行

敦儒頓首再拜未遑繼請政爾懷仰辱手帖欣審甚熟
尊履萬福承餉綠龜紫菓感佩珍貺副以回文鏡銘佛
偃蓼倣投枕輟扇併得清暑區區皆需面謝使還草草
不宣敦儒頓首再拜序臣提幹奉議賢友座前 合盃

附還

敦需再拜去歲疾痛相仍春來方稍向平久曠音問惟
增馳情敦儒居秀粗遣逆謀居于此相去不遠他日有
從遊之便矣憂居想惟每事裝懷向熱千萬強飯為門

戶自愛撥冗乘便草草布此敦儒再拜

一姐孺人意不殊前二十六日晚幸相遇也敦儒上

敦儒再拜中間承惠書殊荷厚意公私袞袞不得即奉
答甚媿也日來想已外除莫便赴行朝否佇聽新除也
偶被旨往四明逼出百冗布此殊媿草草敦儒再拜

一姐孺人久別喜聞安佳尚寒更希將愛家中人都致
問敦儒上

承惠常筆何必及此不敢不愛極媿

右紹興鴻臚少卿朱公敦儒字希真書簡帖五幅真蹟一卷中州遺老百年一人梅花清癯風流蓋與孤山相似幡然一出林宗之中塾矣帖尚足以見其意象之傳也

贊曰洛陽耆英淪于朔塵三十年有人典型之存災手絕倫一日之伸梅花兮繽紛孤山兮片雲

葛常之犀表帖

行書
十行

立方叩頭再拜又覆立方不望犀表忽已數年名德之

重不忘瞻仰竊惟知府朝議以文學政事受知廟堂不
遠治封日聞嘉績諒惟不待報政即有鋒車之召雖在
哀疚不無後望也立方叩首拜覆

右紹興吏部侍郎葛公立方字常之犀表帖真蹟一
卷予于葛氏帖所藏者三世此又嘉定己卯七月過
舟吳門而得之者其無譌矣

贊曰文康之學導其源文定之學濬其流三世之帖
俱傳于予家其亦足以見植槐之志而占良治之表

也歟

蔣宣卿書簡帖

五帖並行書第一帖八行第二帖
二行尾札二行第三帖十二行第

四帖十七行第

五帖十五行

伯愚知縣朝奉仁妣為別頻年不勝思渴冬寒惟所履
佳勝比辱書并附陳提舉書已具報矣思今杜門鄉落
無足言者但半生出仕歸無屋宇不免結廬以安老稚
衰晚勞費可厭也聞甲第雄麗恨未得一拭目耳正寒
萬萬加愛不悉二十三日琳手啟

閣中孺人郎娘以次一一安佳道服甚煩惡念也維揚
常得安問骨肉謝念問附伸意也玆上

衣著二匹酒四斗希知到

伯愚提宮朝奉仁妹即日惟所履佳勝思渴思渴顯親
大蘆行兩地附問當無不達少意乘此乍涼決欲至府
得會見以慰問別偶一二處假舟值出專走此介擬借
仙舟一求庶幾途中得寬穩之適不識可否或辱應允
仍借駕船人即得頭指就路尤幸但煩聞為媿他皆面

言尚冀愛衛不悉十九日望手啟

際再拜啟昨日水衡出為江西常平宮靖康之初併罷
是時初遭變故遠方恐駭二年間軍旅游興身履危難
既解秩便欲挂冠養病偶有召命遂至廣陵初差湖北
漕繼改江西未到間寓居高安敵騎奄至竄伏山谷幾
年貧不能給有肇慶之除且還毘陵及錢塘忽差臨川
到官半年大軍經行迺寇侵迫幾不能保州邑既幸苟
免目前無苦重事即丐宮以歸寄食親舍去秋被召賜

對叨冒郎省未閱月得天台已而報罷雖祠廟不敢請
忽蒙收用分符于此自惟衰頓退黜無復出任意而朝
廷已行之命不敢辭到此殆半年矣兵火之餘廢法病
民之政上下一律故于整革寬猛之際尤為費力老矣
不能堪事但民社所寄不敢不勉耳通問故人自當縷
縷亦恐要知也璪再拜啟

璪再拜啟承居里社極安穩真是第一等福人璪從仕
三十年無一梨之地一椽之居世故如此不比平日一

且緩急叩人之門猶有應者今但可為三箴束腰忍饑
計耳自謀之拙如此故人聞之應發一笑村居堂有五
字句云翻燕巢泥急喧蜂窠葉忙飛鳴俱有役時節豈
相忘餒也思儲粟衣兮欲樹桑謀生吾若拙已矣鬢毛
蒼又云掃軒容榻穩洗竹進風清樹繞扶疎夏山開錦
繡晴屢空無足食多墨未休兵酒薄從深酌憂端或暫
平可見懷沉也專此馳問繼是別上狀庶不輟往來之
信為慰耳潔再拜

右紹興戶部侍郎敷文閣侍制蔣公璩字宣卿書簡帖五幅真蹟一卷中興而來簡札曰趨于文降而不返真隨以亡思古之君子于是亦可以觀百年之流風矣帖得之義興吳氏寶慶乙酉之二月

贊曰廬山之下仙佛之廬多公題扁予熟其體矣而今見其帖大抵小則適而大則婉豈所施有異而筆法亦隨以變適而不流于介婉而不失其健予猶愧乎知書之淺

寶真齋法書贊卷二十二

欽定四庫全書

寶真齋法書贊卷二十三

宋 岳珂 撰

宋名人真蹟

劉季高書簡帖

六帖並行書第一第二帖各十七行第三帖十一行第四帖七行第五帖九行第六帖六行

五帖九行第六帖六行

岑再拜東觀自昔必擇名流往歲范淳夫為夕郎呂子晉為詞臣張文潛為右史近年楊中立亦自是為大諫

晁以道為少蓬間出補外雖如劉無言以罪黜亦得建
昌軍岑也不才誠曰濫處然自元豐改官制後著作郎
無罪出待二年闕為興國通判者必自岑始也伏惟通
前古事實熟本朝典故誰出執事右者岑今不敢覬望
如前輩得進用且引當家惡例求一壘牧民可乎筠州
本是舍人提封儻出一言岑可以飽願哀其窮力賜推
較不敢忘異時廟堂雍容則所覬望不但爾也岑再拜
岑再拜岑孤遠辱被知遇所從來久拔茅連茹豈所敢

覲自惟居閒衣食不足今筠州未有人如得續貂何幸
似之然不知誰能動心出力也岑昨再出割河東郡縣
以資敵國者使指也岑受命而不受辭違詔留地矯制
督兵原岑初心出于忠憤無所坐罪遣怨家當國入熟
而遣之有識之士多為不平而蹤跡孤外曾無熟何之
者今朝廷以至公徠士念失職于一夫遣公入朝顧所
存憐誰若門下或稍借重筆端膚寸膏潤枯槁一明賞
罰以勸在位何獨岑之志也岑本書生無長才具足副

時須方茲艱難試加使令直前犯患義不顧身或有寸
長伏惟加憐察焉岑再拜

岑惶恐百拜伏奉墨帖之賜拜受欣然如造師席幸甚
幸甚蒙鐫喻曲折更荷門下睠記不忘之意岑疾病支
離無復餘念志在醫藥而已得左揆答書未及他語岑
不可但已須著再請岑得如志最上策也設左揆不以
為然願借一言之重但易得一有醫藥處投老殘年生
理可得敢忘大賜心之精微筆墨難見更惟垂察岑惶

恐百拜

岑懷息岑親妹之子葉熊為大府法曹掾願教之誨之
仍求一改官狀成就他所深望也又有聿之子陶植為
吉水令亦望青矚幸甚淮上有可教無小大下諭所願
奉承也岑再拜

岑惶恐岑輒有小懇冒浼台聽家弟嶸得備吏屬且自
往歲蒙顧遇厚甚相見此時比賴不淺矣然去替甚近
尚少闕陞一章岑與江西諸使者皆無雅素門下少留

念似不難辦者不審可遂調護否言之僭易不恃深睹
敢爾耶岑惶恐

岑再拜見南山齋石刻似聞嘗見之敢以塵冒但居間
無使令匆匆裝祿不辦因不復事此惟深察敝邑或有
可教岑願聞願聞岑再拜

右紹興徽猷閣直學士劉公岑字季高書簡帖六幅
真蹟一卷予讀洪文敏容齋隨筆曰真宗時并州謀
帥上謂輔臣曰如張齊賢溫仲舒皆可任但以其嘗

歷樞近或有固辭宜召至中書詢問願往則授之及
召二人至齊賢辭以恐為人所讒仲舒曰非敢有辭
但在尚書班已十年若得改官端撥賜都部署添給
敢不承命輔臣以聞上曰是皆不欲往也勿彊之王
元之自翰林學士以本官刑部郎中知黃州遣其子
嘉祐獻書於中書門下以為朝廷設官進退以禮一
失措置咎在廊廟某一在翰林學士三任制誥舍人
以國朝舊事言之或得給事中或得侍郎或為諫議

大夫某獨異于斯斥去不轉一級與錢穀俗吏混然
無別執政不言人將安仰予謂仲舒嘗為二府至於
自求遷轉及增請給元之一代剛正名臣至於公移
牋書引例乞轉惟其至誠不矯偽故也後之人外為
大言避寵辭祿而陰有營求失其本真者多矣風俗
使然也今觀公首二帖蓋亦有前輩用情之風焉帖
併他帖六開禧丁卯七月得之雪上

贊曰用情之真視古庶幾他帖雖不能盡知筆法皆

清而竒我標淳風以戒言詭

劉行簡前日帖

行書
十行

一止頓首再拜前日幸獲一再瞻望屬懷抱茹痛不能甚款違奉以來豈勝傾嚮伏計已拜綸綍即戒旌麾涓辰上道一止還邑微苦故疾尚圖趨拜併叙辭違之意茲不覩縷仰冀幸察一止頓首再拜

右紹興敷文閣直學士劉公一止字行簡前日帖真蹟一卷開禧丁卯十月得之親安士人汪氏家

贊曰情叶事之宜筆力亦稱之雖得於歛水之湄然
望而識其為茗溪也

劉武忠書簡帖

十九帖並行書第一第五第十三
第十八帖各八行第二第三帖各

十一行第四帖十行尾批二行第六第十四帖各
九行第七帖五行第八帖九行第九帖四行第十
第十一第十二帖各六行第十五第十
九帖各四行第十六第十七帖各七行

錡再拜上啟間違賢範不勝馳向之劇信後未識興居
復何如仰惟吉德君子罄無不宜錡承乏如昨不煩展
念相望未有瞻見之日伏紙但切傾繫引領之至錡再

拜上啟

錡頓首啟辱書荷不忘之意且審別久起居萬福甚悞甚悞聞有鼓盆之戚不易排遣人之處世不如意者十常八九凡百更須以道自處無傷生也且居沙市否他日所之何地況味近如何錡凡百過分所居若村落人事幾絕亦自省事耳郎娘有幾人湘中或有所需勿外相會未卜願言加愛不宣錡頓首啟元英運屬秉義侍

史

錡頓首再拜昨日承訪及下情至感兩日緣與汝陰戰
歿將士飯僧未果延款誨益益增愧忤朝來伏惟孝履
支持十一日解未已定否十小笏聊表區區少助僕馬
之費幸望笑留迺荷近晚請謁併得面賦陳丈書已寫
當面納有委不外謹上狀錡頓首再拜仲恭圍練至孝
錡咨目再拜上啟仲恭制司宣贊即日春和不審孝履
何如衮衮逼行未果上狀迺辱誨示尤用慚忤承聞便
辦奠事想不易營集輒以五十緡少助費用輕浼深愧

千萬客留旦夕專人奉狀次第無由面別謹上狀布左
右不宣錡咨目頓首再拜仲恭制司宣贊

友偶迫行了無須臾暇用是不果子細上狀他須後信
也

錡頓首午刻起居何如堂名欲易之以清美事出顧憲
之傳公清儉彊力視古誠無愧焉所書額并八陣圖臺
太平寺八字納去餘遲面言不宣錡再拜揚中知縣奉

議侍史

錡頓首上啟適沐訪速至感至感移刻伏惟動止輕安
承令預鄉飲酒此盛禮也敢不趨赴獲陪耆俊之會豫
以為慰姑此奉復不宣錡頓首上啟揚中知縣奉議侍
史

周叔八哥大夫仰之保義子宜監場萬福未及奉書彼
無事幸過我也錡再拜

德瞻解元安休堂上泊仙集均休水路迂澀想勞神用
安下處已有俟公到修治也少頃送飯食去次錡再拜

錡頓首拜誨墨之賜審車馬還自鄂渚即遂披承豫增
欣快他容面賦茲不宣錡頓首再拜德瞻先生友照

閣中郎娘一一均休令弟同來否家人輩拜問有委豫
冀示諭上問

錡辱字至感堂上別無他否所諭備悉人馬已差去有
委無外錡再拜德瞻宣教友

錡啟早遣扈青奉手削矣辱誨示審信宿文履休暢既
感且慰諸子荷鈴束十七日定歸復此致謝不宣錡再

拜德瞻秘校友

錡頓首啟意謂可出元日相駁也辱字乃審體中未甚
平和獻歲發春賢者履之倍迎景貺隨分袞袞未得奉
謁幸照不宣錡再拜德瞻秘校友

錡辱誨示至感至感竊聞苦臟府豈非脾胃弱耶李忠
遣去藥不須自贖幸批示當遣人去取也今日極熱千
萬加愛有所需勿外錡再拜德瞻賢友秘省

家人拜意堂上輒以衣三件浼瀆幸恕而留之錡再拜

豚犬輩豈非椎鈍不足教也復辱示字果肯嚴督功課
幸甚幸甚錡與德瞻相與之厚日甚一日區區之情當
有以照而諒之也錡再拜

錡頓首啟午刻伏惟文履休勝錡生朝荷惠長牋佩服
愛玩不敢忘也然獎借過實有所未安區區之懷更俟
面賦匆匆不宣德瞻秘校賢友

錡頓首啟晚刻緬惟動止安勝竊承誕日無以為意香
酒微物祝千百之壽輕觸是愧冀容留也奉狀不宣錡

頓首啟德瞻秘省足下

舍姪深今遣去軍中已干王都統收留若肯留之緩急之間煩為周庇干煩為愧錡再拜

右紹興開府劉武忠公錡字信叔書簡帖十九幅真蹟一卷世謂長鎗大劍與毛錐子為二今觀公字蹟其本固非不同也嘉定甲申三月始得此于維揚

贊曰以勁筆力作往來帖婉有餘妍莊不可狎古者文武初非二流繫於卿士予其從周

劉武忠五詩帖

五帖並
行書

門外蹄輪任迹疎一廬深稱水雲居平生事業將何用
歎括空能讀父書用前韻呈德瞻

一逕縈紆山更深滿川烟靄夕沉沉從來不問榮華事
自有沙鷗信此心

二月陽和花正繁軟風輕扇筍斑斑揚鞭江路心無事
問舍求田過淺山題村舍錡呈德瞻友

偶得一絕

清風葉葉映黃鸝
綠暗紅稀半掩扉
我以忘言靜思慮
子規猶道不如歸

午寢

寓跡唐興寺幽牕得畫眠
西風縈破夢落日亂殘蟬
歲月俄如此功名豈偶然
五湖秋欲好誰在釣魚船
拋
博欲引玉也錡

右劉武忠公五詩帖真蹟一卷
予于名將帖未嘗得也
繫之卿士帖足矣而復出
蓋有意焉於庠詩以寓

志筆以拔竒觀公此帖謂公徒武固不可如先王者
同被秦忌豈大將固不得以說禮樂敦詩書稱耶古
今異宜予得此帖猶信紹定元載二月乙丑

贊曰予表此詩蓋欲天下知將帥未嘗無人夫豈必
孤矢之棄而筆硯之親合之一岐之分噫噉斯箴何
忝于文

楊文靖早間帖

行書
八行

時惶恐早間就時官借水皆以送憲車迂廉訪為辭以

故未能造謁第深愧悚素荷愛念必能見諒也使舟未
行當卜參侯區區非面承不究時惶恐再拜

右紹興龍圖閣直學士龜山先生楊文靖公時字中
立早間帖真蹟一卷洛道既南先生實為中興諸儒
之倡延平之風洋洋乎其逮今也珂少讀語錄竊欽
傳緒寶慶乙酉六月始得是帖于京江處已接物之
要尚可以想見云

贊曰道之在人日用皆其事也待物必誠所以達乎

義也延平之津伊洛之涯渙也筆端波瀾亦可想見
似也

吳傳朋書簡帖

四帖並行書第一帖十七行第二
帖十三行尾記三行第三帖六行

第四帖

四行

說咨目頓首再拜上啟澤民知府中大契兄台座寒律
初嚴不審興居何似伏惟神所休相台侯動止萬福去
違賢誼忽復許久區區懷仰與日俱深自承過豫章難
值端便以故闕于承問記室負歎何已末繇瞻叙惟冀

惠時嗇養沖氣前需節召禱頌真切不宣說咨目頓首
再拜上啟澤民知府中大契兄台座

說咨目頓首上記元俊學士賢友侍史說比幸披豁匆
匆告歸為歉即日侍膳之餘尊履申福譚命牧童還自
廣德已面諭之今往請見可詳叩丞相行年也昆季意
不殊前更不一一致問比獨不得一面元忠為不滿惟
冀為親壽重遽中代傳言理無報教謹啟四月晦說頓
首上記

淮陰娑羅碑近得之納寄一本懇借古碑中有帶行草者告乘間檢尋更數日專介叩請

說再拜上啟說數竒之迹分甘置散比閱邸報忽有盱眙之除繼報代人已改命恐遂促行自茲瞻望愈遠情深邑邑匆遽聊此上詞良愧率畧說再拜上啟

說外弟梁校正克鞏占籍府下往干典謁幸垂顧盼聞舊嘗登門相不待鄙言之祝也說悚息

右紹興主管崇道觀吳公說字傳朋書簡四帖真蹟

一卷行都九里松本公題扁思陵嘗自歎以為不及
筆法可睹矣今帖蓋小楷尤清偉可觀者紹定戊子
三月得之京口

贊曰小書楷則本晉人降而唐世體益真妙趨要識
筆有神行行清妍雜奇偉奇為精神楷為體吳君筆
力備諸此

吳傳朋游絲書飲中八仙歌帖

四十八行

知章騎馬似乘船眼花落井水底眠汝陽三斗始朝天

道逢麴車口流涎恨不移封向酒泉左相日興廢萬錢
飲如長鯨吸百川銜盃樂聖避世賢宗之瀟灑美少年
舉觴白眼望青天皎如玉樹臨風前蘇晉長齋繡佛前
醉中往往愛逃禪李白一斗詩百篇長安市上酒家眠
天子呼來不上船自稱臣是酒中仙張旭三杯草聖傳
脫帽露頂王公前揮毫落紙如雲烟焦遂五斗方卓然
高談雄辯驚四筵 飲中八仙歌 傅朋

右吳傳朋游絲書杜甫飲中八仙歌真蹟一卷紹熙

壬子歲二月先君以帥事如五羊道過太和之快閣
外嫻張子禮彥和輅於境上憑欄縱語偶及書法發
奮共視古名蹟因歎近世鮮能書者張翌日攜數帖
來乃中興以後諸賢詩簡因遂留此為儘是時置篷
牕几上珂侍旁亦得日閱無算兄筍餘至南安舍舟
而陸乃卷界囊中按是體說自名游絲書云古所無
有屏山劉子翬作詩曰清圓無瑕二三月時見游絲
轉空閣誰人窺此一段奇著紙春風吹不脫蓋謂此

也攷之唐書呂向能一筆環寫百字若縈髮然也號
連錦書則此書亦有所本特不系所繇名屏山之詩
又曰定知苗裔出飛白古人妙處君潛得亦不系連
錦豈忘之耶出奇銜巧牽合不斷勻勁媚直凡工書
者例難之侯筆力之進退每以是為要法雖若纖巧
不可廢也藏之以備書體之一焉

贊曰天絲兮舞空春光兮怡融杲麗日兮柔風想八
仙兮飲中倒景兮騎紅落紙兮游龍俱下上兮西東

笑春歸兮無蹤墨皇兮化工留玩兮何窮

吳傳朋四體書帖

珠樹玲瓏振好音別來難步國門尋平涇萬象青天闊
冷閉三山碧海深玉柙夜藏橫月劍錦囊春貯倚花琴
碧雲才子應相問依舊釣魚烟水心

行書十
二行

得道真僧不易逢幾時歸去願相從自言家住連滄海

別有蓬萊第一峯

楷書
五行

莫厭追歡語笑頻尋思離亂可傷神間來屈指從頭數

得見清平有幾人

游絲書
六行

故人昔隱東蒙峯已佩含景蒼精龍故人今居子午谷
獨在陰崖結茅屋屋前太古玄都壇青石漠常風寒漢
子規夜啼山竹裂王母畫下雲旗翻知君此計成長往
芝草琅玕日應長鐵鑠高垂不可攀致身福地何蕭爽

草書二

十一行

嘉禾道正鄒淵明一鄉羽客之好事者余過郡頻日見
臨袖軸紙索書未暇作洎解行復出祖郊關之外意非

苟然經吳江值便風發遠興乃為書之紹興丁卯初夏

吳傅朋

行書
六行

常時任顯晦秋至轉分明縱被微雲掩終能永夜清含

星動雙闕伴月落邊城牛女年年渡河曾風浪生

草書
八行

紹興甲子重陽前一日書於新市海會禪寺傅朋

草書
四行

誰將石黛淬春潮復撚黃金作柳條西崦東溝從此好

筍輿追我莫辭遙

草書
六行

日出籬東水雲生舍北泥竹高鳴翡翠沙僻舞鷓鴣

游
綠

行書四

了知身心畢竟

原關

與法同生體無異知是空花同即無

輪轉亦無身心被受生死

游絲書
八行

說頓首再拜澤民提宗宮丞賢友比辱教墨久稽裁報
愧甚比日尊履動止何似需惡札納上卷軸紙數太多
恨不能精也說遠過鄉里展掃過郡託蔣丞致遠不遑
疊幅餘冀順序寶鍊以承休命不宣說頓首再拜澤民

提宗宮丞賢友

行書十
一行

右吳傳朋四體書雜詩頌真蹟二卷其一末有跋語
凡四篇首篇以行次以楷次以游絲次以草通著一
印其二末有手帖亦四篇半以草半以游絲通著一
印是書皆以應人之求皆寓興而作隨體輒竒皆入
能品信乎近世之名蹟也前帖得于嘉禾後帖得于
京口相去凡六歲其體也雜雖有草法不可以析故
俱繫之能書用質所聞以代書斷

贊曰先君嘗評近書世有曰公行書如漢武仙臺侍

女飄居長袖清嫻姣麗特惠無出世間熊小指如京
師大酺少年縱觀毬馬韶秀時出闌闌氣象草聖如
駿馬注城以其居天閑之久終不失規矩惟游絲得
弄翰遺意輕雲纖月自成一家易評難工不可輕置
喙噫噦其庶幾知言也哉不然則簡貴安徐玉掌瓊
琚其亦深於書者矣

趙忠簡送春詩帖

行書
七行

次韻送春

坐嘆空山落景催幾時江上葉舟迴初無妙術留春住
強覓餘懽並酒來體力寒多思故絮齒牙衰甚怯新梅
秦川洛水紛華地白首天邊共此杯

右紹興宰相太傅豐國趙忠簡公鼎字元鎮次范元
長韻送春詩帖真蹟一卷公剛方之操正大之學經
綸之用啟沃之忠所謂抗之萬乘而不懾寘之九死
而不顧言論英烈夏日秋霜近古社稷臣自漢蕭太
傅而下惟公足以當此公以儲議之異為偃月所傾

投荒累年卒死奇禍詩蓋海上所作因元長所寄而
賡之者秦川洛水猶不能拚北望之悲亦重可哀也
已予舊從公孫廬州君綸識公帖筆力勁甚此詩字
體嚴穩平重蓋末年所書紹定戊子二月得之嘗上
故家感慨之餘竊迹楚辭大招之義以寫踟躕不見
之心庶因卷舒以慰忠憤

贊曰陶陶孟春草木莽只白日昭昭照下土只瘴烟
浩淫雜海霧只憔悴行吟閩島嶼只公乎歸徕無媿

此詩句只黎母之居家炎馭只牽擗盤鬱蔽雲浮只
蝮虺觸鱗蛇僻幽只人跡闕絕魑魅仇只公乎歸徕
空山不可以久游只鳴鳶跼跼墮滄溟只蛟蜃喫兩
畫冥冥只折肱見沫瞻斗星只夕照黃濁波濤腥只
公乎歸徕落景不可以久停只茅葦叢薄桃李囚只
韶容駘蕩異中州只陽蘇弗舒金石流只短狐秘蜮
起蟄环只乎公歸徕春不可留只卉服椎髻駢蜉蝣
只唧嘍啁啻言莫諒只烹蛇茹蠱食且恙只眇其愁

子雖迴曠只公乎歸徠歡不可並只毒如下濕既沮
疫只煩蒸焚悞交戰迫只中鬱鬲痞悼僚慄只層冰
肅霜接朝夕只公乎歸徠寒兮無與乎體力只長鯨
層浪隔帝家只鳥春蠱秋年華只星河八月記送流
槎只杳杳萬里誰還沙只公乎歸徠哀兮不關乎齒
牙只公乎歸徠尋川之衍夷公所生只解梁風鹹民
萃營只土厚水深衍易平只洪河大川坎不盈只居
之而安樂不可名只公乎歸徠洛水之繁庶公所寓

只龍門伊闕風氣聚只葩竒俗淳康汰阜只圖洲書
囿今古慕只資之而深遠不可喻只公乎歸徠無歎
乎江上只紫蓋黃旗天所王只浮埃蔽蒙騁遠望只
聖主如天既殛放只聊以永懷無沮喪只公乎歸徠
無悼乎天邊只資善大議同諸賢只復讎正義維萬
年只質乎人心靡或偏只守此正中無遷延只噫噫
詩乎公以寫我心只彼蒼者天杳難謀只吁嗟時乎
天以鼻我公只彼已者秦曷克終只樂只韶只舜之

昭只無議其將聖維堯只讒愚煽兇同盛朝只公乎
歸徕尚予家之招只

范元長觀梅詩帖

行書
七行

久陰初晴奉陪宮使樞密觀梅 冲

掃盡陰氛儘見春荒山風物一時新謫仙自是和羹手
聊與梅花作主人

右紹興翰林侍讀學士資善堂翊善范公冲字元長
觀梅詩帖真蹟一卷公以元祐故家克紹聲烈德履

望實昭於搢紳所謂文獻接於中原典型盛於喬木
南渡而後莫公先者詩蓋遺趙忠簡以建炎四載十
月自右府歸奉祠故謂之宮使樞密云忠簡以三詩
賡之其一曰曳杖山間自探春雨餘梅意已情新兵
戎草草傷淪落一醉花前有幾人其二曰種柳栽花
舊惜春不知春色為誰新年年青眼樽前客只有寒
梅是故人其三曰歸來醉極一枝春照影涼蟾過雨
新不似霸陵愁醉尉穿雲渡水寂無人今見忠正德

文集中紹定戊子四月得之京口餉所

贊曰范本蜀望世仍忠嘉南渡而來人門莫加帝咨
典型詔起幽遐翊嫩銅龍執經金華筆取端重而兼
竒葩儒先所推奚待詡夸有偉豐公如璧不瑕卷懷
樞庭寓賞梅花公從北方共之天涯均德此誼而兼
葦葭寒谷將春輕陰不遮潔樽斯從寄驛匪賒倡汝
和予屏淫斥哇託彼陰晴以寫正邪愛君之心對越
靡差一瞬百年遺墨驚鴉臭兮同蘭好兮投瓜二公

其仙星箕漢槎如此帖者可復得耶清並玉雪秀同
綺霞矢辭以藏庸識名家

陳參政簡易帖

行書
六行

台眷伏惟均被新祉城中有委願聞之蒙眷照之厚儻
有所諭片紙貺之以從簡易不識可乎與義再拜

右紹興參政資學士政簡齋先生陳公與義字去非
簡易帖真蹟一卷士以詩翰宗於一時而致位丞弼
直躬事上終始無闕如公者亦可以為名臣矣嘉泰

甲子予來行都遇公之孫某於湖上從容幾月而得此帖又二十載乃裸而贊之

贊曰眼底中興日月手中建筆虹霓造化功成秋兔先生原有新詩

陳參政陰雨詩帖

草書
七行

陰風三日吹南極二月已晴寒裂石長林巨木受軒輕
洞庭倒流瀟湘黑君不見古廬竹扉聲策策中有鈴
落南客曾經破膽向炎官敢不修容待風伯

右簡齋先生陰雨詩帖真蹟一卷按先生集題篇為
陰雨今書則無之蓋惟以寓草聖也舊與帖同卷既
別詩文亦別而彙之

贊曰世謂北客惟暑之畏亦何至是先生之詩殆他
有所謂新亭之泣如王導輩亦何嘗嗚死於吳地蓋
惟以其舉目有山河之異耳予侍先君子每見言及
河朔舊事未嘗不潸然隕涕嗚呼先生之作此詩其
亦以是耶予家江南者三世矣歲月易易後生者當

欽定四庫全書

寶真齋法書贊卷二十三